

**Uunga siunnersuut: Piginneqatigiilluni inissiat pillugit Inatsisartut inatsisaata allanngortinnissaa pillugu Inatsisartut inatsisaat**

(Inissiat attartortittakkat allanngortinnerat, kaaviiartitsinissamut inerteqqut il.il.)

(Ineqarnermut Attaveqaasersuutinullu Naalakkersuisoq)

**Akissuteqaat**

(Ineqarnermut Attaveqaasersuutinullu Naalakkersuisoq)

**Aappassanneerpeqarnera**

Inatsisartut Sanaartornermut Ataatsimiititaliaat Naalakkersuisuni piginneqatigiilluni inissiat pillugit Inatsisartut inatsisaata allanngortinnissaa pillugu Inatsisartut inatsisaannut siunnersuutaannut isumaliutissiissuteqarput. Naalakkersuisut sinnerlugit ataatsimiititaliaq siunnersuummik peqqissaartumik suliarinninneranut qutsavigaara.

Inatsisissatut siunnersuut arlaleriiaanik ajornartorsiutitalik pineqartoq, ineqarnermut suliassaqrarfiup ullumikkut qanoq aaqqissuussaananeranut annertuumik sunniuteqarsinnaasoq, matumani pineqartoq, Naalakkersuisuni ataatsimiititaliap isummersornera isumaqatigaarput.

Inatsisissatut siunnersuut akuerineqassappat, inatsisip ataasiakkaatigut qanoq atorneqarnissaanut tunngatillugu pissutsit arlallit ataatsimiititaliap ilisimaneqanngitsutut isigigai, ataatsimiititaliap isumaliutissiissummini erseqqissarpaa. Namminersorlutik Oqartussat inissiaataasa attartortittakkat sorliit allanngortinneqartussaananerisa nalornissutigineqarnera, tamatumani pingaartumik pineqarpoq.

Tassunga tunngatillugu erseqqissassavara, inatsisissatut siunnersuut ineqarneq pillugu aaqqissuusseqqinnissaq pillugu politikkikkut isumaqatigiissut, arfineq marlunnik immikkoortoqartoq, eqqarsaatigalugu isigineqassammat. Ineqarneq pillugu aaqqissuusseqqinnissamut siunertaavoq, ineqarnermut suliassaqrarfimmik oqimaaqatigiilersitsinissaq aammalu innuttaasut imminnut inissiamik pilersornissaannut periarfissaqarnissamut tunngavissinissaq, taamaalillutik taakkua siunissami inigisaminnik piginnittunngorsinnaalissallutik. Namminersorlutik Oqartussat inissiaataasa attartortittakkat piginneqatigiilluni inissiannortillugit allanngortinnissaat, ineqarneq pillugu aaqqissuusseqqinnissap atuutsinneqalernissaanut ilaatillugu, *Namminersorlutik Oqartussat inissiaataannik ikilisaanissaq* pillugu ilaatinneqartunut ilavoq.

Ineqarneq pillugu aaqqissuusseqqinnissami allassimavoq Namminersorlutik Oqartussat inissiaataannik ikilisisinissaq pillugu politikkikkut isumaqatigiissutissap isumaqatiginninniutigineqarnissaanut aggersaasoqassasoq, taannalu tunngavigalugu Namminersorlutik Oqartussat inissiaatai attartortittakkat sorliit piginneqatigiilluni imaluunniit

nammineq pigisatut inissiannngortillugit allannngortinneqartussannngornissaannut pilersaarut aalajangersimasooq suliarineqassasooq.

Ataatsimiititaliap isumaliutissiissutaani isumaliutersuutit naleqquttorpasuit ilaapput, taakkualu Naalakkersuisuni politikkikkut isumaqatiginninniarnerni ilanngunneqartariaqartutut isigaarput.

Ataatsimiititaliami amerlanerussuteqartut, tassaasut Inuit Ataqtiginnit aamma Siumut-mit ilaasortaatitat, siunnersuutip akuerineqarnissaa inassutigaat. Ataatsimiititaliap § 45f, imm. 2-mut aamma § 60, imm. 2-mut tunngatillugu inatsisilerinermi teknikkikkut ajornartorsiutit pissutigalugit Naalakkersuisuni allannguutissatut siunnersuummik saqqummiussinissaat kaammattuutigaarput.

Naalakkersuisuni ataatsimiititaliap inassuteqaataa akueriniarlugu aalajangerpugut, taamaattumillu Naalakkersuisuni aappassanneerinissamut allannguutissatut siunnersuummik saqqummiussipput.

Pisortat taarsigassarsiarititaat, inissianik attartortittakkanik allannngortinneqartunik piginneqatigiilluni inissiatillit peqatigiiffiata pisineranut ilaatillugu taarsigassarsiarinneqartut, taarsigassarsianut aserfallatsaaliuisimannnginnerup tigusinerup nalaani uppersarneqartup, iluarseqqinnissaanut aningaasalersornissaanullu taarsigassarsiarineqartunut tunngatillugu, akilersorneqarnissaasa nikisinneqarsinnaanissaannut periarfissaqarnera, allannguutissatut siunnersuummi erseqqissarneqarpoq. Erseqqissaanermi matumani § 45f imm. 2-p, § 60 imm. 2-mut maannakkut atuuttumut akerliunnginnissaa qulakkeerneqarpoq, tamatumaniilu ataatsimiititaliap isumaliutissiissutaa akuerineqarpoq.

Taamatut oqaaseqarlunga Naalakkersuisut sinnerlugit oqaluuserisassaq Inatsisartunut kajumittumik suliasannngortippara.